

**Акафист Пресвятой Богородице
в честь чудотворной иконы
КАЗАНСКАЯ**

Акафист Пресвятой Богородице в честь чудотворной иконы КАЗАНСКАЯ

Кондак 1

Взбранней от всех родов Заступнице рода христианскаго, покровом Своея благодсти покрывающей страну нашу православную, благодарственная пения приносим Ти, Богородице, о явлении чудныя Твоея иконы. Ты же, яко всемилостивая, всех притекающих к Тебе Помощнице, заступай нас во всех скорбех и нуждах, бедах и напастех, да зовем Ти: Радуйся, Заступнице усердная рода христианскаго.

Икос 1

Ангел предстатель послан бысть рещи Богородице "Радуйся", егда Бог Слово воплощашеся во утробе Ея: и мы, грешнии, прославляюще явление чудныя Ея иконы и Божественнаго Младенца Спаса Христа, со умилением вопием Благодатней:

Радуйся, Богоизбранная Отроковице;

радуйся, Мати Божия.

Радуйся, Царице Небесе и земли;

радуйся, светлое Церкви Небесныя и земныя украшение.

Радуйся, Ангелы чтимая;

радуйся, певаемая от Серафим.

Радуйся, светлое пророческое сбытие;

радуйся, апостолов похвало.

Радуйся, мученическое исповедание;

радуйся, преподобных венче.

Радуйся, праведных веселие;

радуйся, грешных упование.

Радуйся, Заступнице усердная рода христианскаго.

Кондак 2

Видящи, Всенепорочная, с высоты Небеснаго жилища Своего, идеже с Сыном Твоим в славе пребываеши, скорбь рабов Твоих в новопросвещенном граде, яко гневнаго ради Божия посещения вера Христова поругаема бывает агарянским зловерием, благоволила еси явити икону Свою, чудесы ю прославляющи, да утверждаемии знаменьи Твоя благодати, христоролюбивии людие верно вопиют Богу: Аллилуиа.

Икос 2

Разумение трикратнаго явления Богоматере мудрая отроковица ищущи, тече ко властем, поведаящи им дивное явление и грозное прещение: мы же дивящесе свыше данному отроковице вразумлению, благоговейно вопием к Препоблагословенней:

Радуйся, устнами чистыми хвалу Богови совершающая;
радуйся, тайны благодати Божия верным открывающая.
Радуйся, верных известная похвало;
радуйся, молние, неверных устрашающая.
Радуйся, славою чудес Твоих верных разум озаряющая;
радуйся, агарянскаго зловерия обличение.
Радуйся, гордыни их низложение;
радуйся, веры христианския утверждение.
Радуйся, почитания святых икон освящение;
радуйся, скорбь нашу в радость претворяющая.
Радуйся, несумненною надеждою нас увеселяющая.
Радуйся, Заступнице усердная рода христианскаго.

Кондак 3

Сила Вышняго благодатию Богоматере умудри и укрепи отроковицу к исканию многоценнаго Божия дара, и та, с верою дерзаючи о Господе, приступи к труду и, скрытое в земли обретши сокровище святых иконы Богоматерни, радостно возопи к Богу: Аллилуиа.

Икос 3

Имеючи благоутробное промышление о новопросвещенных людех града Казани, от пречестныя Твоя иконы токи чудес источила еси, Владычице, слепым телесныма очима зрение подаваючи, омраченных же душевно светом богопознания и благочестия озаряючи, девствующим под осенением Твоя иконы пристанище небурное даряючи. Сего ради зовем Ти:

Радуйся, явлением иконы Твоя тьму лютых обстояний отгоняющая;

радуйся, лучами чудес всех просвещающая.

Радуйся, слепых прозрение;

радуйся, омраченных смыслом просвещение.

Радуйся, славо Православия;

радуйся, тихое пристанище ищущих спасения.

Радуйся, Мати целомудрия;

радуйся, покрове и ограждение девства.

Радуйся, Еюже ликовствует все множество верных;

радуйся, Еяже ради рыдает демонское полчище.

Радуйся, всех христиан вожденная Помощнице;

радуйся, всех скорбящих Радосте.

Радуйся, Заступнице усердная рода христианскаго.

Кондак 4

Бурю смятений и крамолы врагами воздвигнутую в стране нашей утолити тщащся блаженный Ермоген, писатель чудес Твоя, Богомати, иконы, слезно пред нею молящися и, видев, яко воинству православному в щит и победное знамение Твоя икона даровася, верою укрепляемый до конца живота своего, вопияше Богу: Аллилуиа.

Икос 4

Глышавше православнии воины откровенную преподобным Сергием святителю Арсению тайну, яко предстательством Богоматере суд об Отечестве нашем преложен на милость, икону Богоматерню, яко знамя

победное, приемше, исхитиша мать градов русских из рук супостат и возопиша Заступнице христиан:

Радуйся, Мати Бога Вышняго;

радуйся, яко за всех молиши Сына Твоего, Христа Бога нашего.

Радуйся, яко всем твориши спастися в державный Твой покров прибегающим;

радуйся, Заступнице всех сущих в скорбех и болезнях.

Радуйся, всем молящимся сокрушенным сердцем пред пречистым Твоим образом полезная дарующая;

радуйся, избавление зол всем, не возвратно надежду имущим на Тя.

Радуйся, тихое и доброе пристанище;

радуйся, скорая Помощнице.

Радуйся, готовый и теплый покрове спасения;

радуйся, источающая нам неоскудную милости.

Радуйся, предваряющая на помощь;

радуйся, избавляющая от всех бед.

Радуйся, Заступнице усердная рода христианскаго.

Кондак 5

Боготечная звезда явися Твоя, Богомати, икона, всю страну Российскую обтекающая, лучами чудес Твоих осиявающая всех блуждающих по морю страстного жития, мрак печалей и мглу всяких недугов и скорбей прогоняющая и наставляющая на путь спасения с верою к Тебе притекающих и вопиющих к Богу: Аллилуиа.

Икос 5

Видев царь Петр, яко от святыя иконы Богоматерни благодатию Божиею содеваются многия чудеса, приемлют ю в путеводительницу воинству своему и в день брани на свеев в щит и покров, и победив до конца врага помощию Богоматере, тем камень совершенный во основание новаго царствующаго града положи, икону же Твою чудную, яко освящение, яко щит и ограждение, в сердце града постави. Сего ради вопием Пречистей:

Радуйся, жилище и доме Христа Бога нашего;
радуйся, вместилище неизреченных Его славы.
Радуйся, граде одушевленный, присно царствующий;
радуйся, палато преукрашенная.
Радуйся, Радосте градов и весей;
радуйся, непобедимое христиан в бедах хранилище и
предградие.

Радуйся, Церкви Православных похвало;
радуйся, Русской земли утверждение.
Радуйся, христоролюбиваго воинства Помощнице;
радуйся, врагов одоление.
Радуйся, от бед избавление;
радуйся, Матерними Твоими щедротами всех
посещающая.

Радуйся, Заступнице усердная рода христианскаго.

Кондак 6

Предстояще пред пречистым Твоим образом архиереев
сословие и вси людие, монаси и мирстии, проповедуют,
Госпоже Богородительнице, великия Твоя милости, яко грады
ограждаеши, обители покрываеши, вси защищаеши, и,
ведуще Тя воистинну Помощницу сильну и непобедиму, со
слезами приносят Ти молитвы, да прострещи к Сыну Твоему
Богоносныя руки за люди Твоя, во еже избавити нас от всех
бед и напастей, да благодарне вопием Богу: Аллилуиа.

Икос 6

Возсиявши просвещение истинное и отгнавши древле
лесть агарянскую во новопросвещенной стране
Казанской, ныне во всех градах российских светиши светом
чудес и милостей: притекающим бо с верою ко Твоей иконе
цельбоносней скорбей избавление, недугов исцеление и
радости всякия исполнения приемлют, вопиюще Тебе
усердно:

Радуйся, неистощимый источник святыни;
радуйся, многотекущая река Божественных благодати.

Радуйся, грешных с Богом примирение;
радуйся, грехов наших очищение.
Радуйся, благочестия Наставнице;
радуйся, в добрых делах утверждение и помощь.
Радуйся, добрыя обеты приемлющая;
радуйся благим намерениям способствующая.
Радуйся, злыя начинания разрушающая;
радуйся, вражия козни расторгающая.
Радуйся, скорая человеком Помощнице;
радуйся, милость сугубо нам подающая.
Радуйся, Заступнице усердная рода христианскаго.

Кондак 7

Хотящу народу православному исповедати милости
Препоблагословенныя Царицы Неба и земли и по силе
благодарственная принести о избавлении его от нашествия
иноплеменных, дивному храму, созданному в честь
пречудныя иконы, победная в дар принесе, да вси памятующе
милость Богоматере, спасшия град сей и страну, выну
воспевают Богу благодарными усты: Аллилуиа.

Икос 7

Стольному граду России святая икона Твоя, Богомати,
воистинну явися благая Одигитрия, якоже древле
Цареграду: к Тебе бо прибегают людие, помощи Твоея на
начало пути и дел своих просяще и благодарственная
приносяще моления пред пречистою иконою Твоею за
избавление от скорбей и напастей, Тебе Помощницу и
Заступницу крепкую ведают. Темже благодарственно вопием
Ти:

Радуйся, Российския страны покрове;
радуйся, Православия в ней ограждение и утверждение.
Радуйся, несокрушимый щите воинов наших;
радуйся, броне их неуязвимая.
Радуйся, козни врагов обличающая;
радуйся яко паучину их растерзающая.

Радуйся, нечестия обличение;
радуйся, крамолы разрушение.
Радуйся, юных от заблуждений исправление;
радуйся, старцев утешение.
Радуйся, душевредных учений низложение;
радуйся, душеполезных знаний дарование.
Радуйся, Заступнице усердная рода христианскаго.

Кондак 8

Странно и сумнительно неверующим слышати, как от иконы Твоея токи благодати истекают, воня животная благоухает: мы же, верующе слову, реченному Тобою, Владычице, к первописанней иконе: "С тобою Моя благодать и сила", уповаем, яко и с сею иконою благодать Твоя выну: темже благоговейно предстояще лобызаем ю, покланяемся ей, яко Тебе Самей сущей, честь бо иконы на первообразное восходит, и Твоя благодать сею иконою знамения и чудеса содевает всем с верою притекающим к Тебе и вопиющим Богу: Аллилуиа.

Икос 8

Вся бывши горе, к Небесным взята, и земных не оставляеши, Богомати, священным Твоим предстательством: имаши бо Матернее дерзновение ко Христу Богу нашему. Темже утверди в мире глибоце православных житие и вся полезная всегда даруй рабом Твоим, да величающе воспеваем Ти:

Радуйся, Невместимаго вместилище;
радуйся, осененная силою Вышняго.
Радуйся, прозябшая Клас Небесный;
радуйся, мир весь душепагубнаго глада избавльшая.
Радуйся, выну ходатайствующая за род наш;
радуйся, яко много может молитва Твоя пред Сыном Твоим и Богом.

Радуйся, всех нас при Кресте Сына Твоего усыновившая;
радуйся, всегда Матернюю любовь к нам являющая.

Радуйся, Ходатаице вечных благ;
радуйся, и во временней жизни полезная нам подающая.
Радуйся, известное прибежище наше во всех скорбных
обстояниях;
радуйся, несомненное утешение в печалех.
Радуйся, Заступнице усердная рода христианскаго.

Кондак 9

Всякого естества ангельскаго превысшая явилася еси,
Пресвятая Дево: Бога бо зачала еси плотию,
Невместимаго всеми вместила еси во утробе Твоей, на руках
носила еси Носящаго весь мир дланию: темже, яко
честнейшую Херувим и славнейшую без сравнения Серафим
величающе Тя, вопием о Тебе Богу: Аллилуиа.

Икос 9

Ветия многовещанная, яко рабы безгласныя, видим о Тебе,
Богородице: недоумет бо всяк язык благохвалити Тя по
достоянию, изумевает ум пети Тя, Богородице; обаче Благая
сущи, прими и от нас архангельский глас, Тебе вопиющих:

Радуйся, Благодатная;
радуйся, яко Господь с Тобою.
Радуйся, Благословенная в женах;
радуйся, обретшая благодать у Бога.
Радуйся, родившая Спасителя миру;
радуйся, Мати Сына Божия.
Радуйся, Родительнице Вечнаго Царя;
радуйся, израстившая нам плод живота.
Радуйся, освященная Духом Святым;
радуйся, осененная силою Всевышняго.
Радуйся, верная рабо Господня;
радуйся, яко Тя блажат вси роди.
Радуйся, Заступнице усердная рода христианскаго.

Кондак 10

Спасти хотящи многия от находящих зол, скорбей и
болезней, чудную икону Твою, Богомати, даровала еси,

еяже ради слепии прозирают, хромии ходят, разслабленнии
возстают, беснующиися исцеляются, земли плодоносие
подается, людие от смертоносныя язвы избавляются, грады и
домы от огня спасаются: темже прославляюще Бога, дающаго
нам таковыя милости, вопием Ему усердно: Аллилуиа.

Икос 10

Стена еси, Богородице, стране Российстей, градом
ограждение и слава, православному воинству на враги
укрепление. Темже, благодаряще Тя, вопием:

Радуйся, прославляющих Тя прославляющая;

радуйся, не чтущих Тя посрамляющая.

Радуйся, врагов устрашение;

радуйся, от нашествия иноплеменных избавление.

Радуйся, воинов крепосте;

радуйся, в дни брани забрало и ограждение.

Радуйся, в дни мира живоносный саде, увеселяющий
сердца верных;

радуйся, оружие, егоже трепещут демони.

Радуйся, спасительный елей, умащающий греховныя раны
кающихся;

радуйся, теплое наше упование.

Радуйся, несомненная наша надеждо;

радуйся, тихое и доброе пристанище.

Радуйся, Заступнице усердная рода христианскаго.

Кондак 11

Пение хвалебное и благодарственное приносят Тебе,
Владычице, припадающе ко иконе Твоей и любезно
лобызающе ю, дев лица, под державным покровом Твоим
тихое и мирное иноческое житие провождающии, и
возложивше на Тя все упование, радостно вопиют Богу:
Аллилуиа.

Икос 11

Яко светоприемную свещу, зрим Твою честную икону,
Пресвятая Владычице: та бо невещественный огнь

благодати Твоя восприемши, и в подобии ея новы возжигает светильники, причастны тояжде силы благодатныя, и озаряет чудеса, наставляющи на путь спасения всех вопиющих Ти сице:

Радуйся, Невесто невестная;
радуйся, Богоизбранная Отроковице, Мати Дево.
Радуйся, добрая Наставнице непорочнаго девства;
радуйся, Хранительнице ревнующих о чистоте.
Радуйся, жен похвало;
радуйся, дев величание.
Радуйся, вдов заступление;
радуйся, сирот призрение.
Радуйся, нищих Питательнице;
радуйся, нагих одеяние.
Радуйся, печальных утешение;
радуйся, скорбящих веселие.
Радуйся, Заступнице усердная рода христианскаго.

Кондак 12

Благодать дати восхотевши почитающим Тя с любовью, Богородительнице, присущую Ти силу благодатную оставила еси во святых Твоих иконах, ибо Божественная благодать, спребывающи тем (иконам), знамения и чудеса выну содевает и душевных и телесных недуг исцеление всем с верою приходящим подает Твоими Богоматерними непрестанными к Богу молитвами о вопиющих Ему: Аллилуиа.


Икос 12

Поюще Твоя чудеса, бывшая в древняя и настоящая времена, хвалим Тя, яко Живоносный Источник благодати, яко неистощимую реку чудес, яко бездну милости и щедрот, и все упование по Бозе возлагающе на Тя и в сей и в будущей жизни, прославляюще Тя, вопием:

Радуйся, христиан непостыдное упование;
радуйся, верных спасительное прибежище.
Радуйся, ненадежных надеяние;

радуйся, отчаянных спасение.
Радуйся, бане, омывающая совесть;
радуйся, росе, оживляющая души.
Радуйся, болезней врачевство скорое и безмездное
радуйся, от всех бед быстрое избавление.
Радуйся, Утешительнице во всякой скорби;
радуйся, из глубины погибели спасающая.
Радуйся, отрадо в день смерти;
радуйся, единая надеждо и по смерти.
Радуйся, Заступнице усердная рода христианского.


Кондак 13

 Всепетая Мати, рождшая всех святых Святейшее Слово, прими ныне малое сие моление и, величия ради благодати Твоея и бездны щедрот Твоих, не помяни множества грехов наших, но исполни во благих прошения наша, подавающи телу здравие, души спасение, избавляющи от всякия нужды и печали и Царствия Небеснаго наследники сотворяющи всех верно вопиющих Богу: Аллилуиа.

Этот кондак читается трижды, затем Икос 1 и Кондак 1.

Молитвы Пресвятой Богородице перед Ея иконой, именуемой “Казанская”

Молитва первая

 Пресвятая Госпоже Владычице Богородице! Со страхом, верою и любовью припадающе пред честною иконою Твоею, молим Тя: не отврати лица Твоего от прибегающих к Тебе, умоли милосердая Мати, Сына Твоего и Бога нашего, Господа Иисуса Христа, да сохранит мирну страну нашу, Церковь Свою Святуя да незыблему соблюдет ю от неверия, ересей и раскола. Не имамы бо иныя помощи, не имамы иныя надежды, разве Тебе, Пречистая Дево: Ты бо еси всесильная христиан Помощница и Заступница. Избави всех с верою Тебе молящихся от падений греховных, от навета злых человек, от всяких искушений, скорбей, бед и от напрасныя

смерти: даруй нам дух сокрушения, смирение сердца, чистоту помышлений, исправление греховныя жизни и оставление прегрешений, да вси благодарне воспевающе величия Твоя, сподобимся Небеснаго Царствия и тамо со всеми святыми прославим пречестное и великолепое Имя Отца и Сына и Святаго Духа. Аминь.

Молитва вторая

◊, Пресвятая Владычице Богородице, Царице Небеси и земли, вышшая ангел и архангел и всея твари честнейшая, чистая Дево Марие, миру благая Помощнице, и всем людем утверждение, и во всяких нуждах избавление! Призри и ныне, Госпоже Всемилостивая, на рабы Твоя, Тебе умиленною душою и сокрушенным сердцем молящихся, со слезами к Тебе припадающия и покланяющия пречистому и цельбоносному образу Твоему, и помощи и заступления Твоего просящия. О, Всемилостивая и Премилосердая Дево Богородице Чистая! Воззри, Госпоже, на люди Твоя: мы бо грешнии не имамы иныя помощи, разве Тебе и от Тебе рождшагося Христа Бога нашего. Ты еси заступница и предстательница наша. Ты еси обидимых защищение, скорбящим радование, сирым прибежище, вдовам хранительница, девам слава, плачущим веселие, больным посещение, немощным исцеление, грешным спасение. Сего ради, о Богомати, к Тебе прибегаем, и на Твой Пречистый образ с Предвечным на руку Твоею держимым Младенцем, Господем нашим Иисусом Христом взирающе, умиленное пение Тебе приносим и вопием: помилуй нас, Мати Божия, и прошение наше исполни, вся бо суть возможна ходатайству Твоему: яко Тебе слава подобает ныне и присно и во веки веков. Аминь.

**Тропарь Пресвятой Богородице перед Ея иконой,
именуемой “Казанская”**

Тропарь, глас 4

Заступнице усердная, Мати Господа Вышняго, за всех молиши Сына Твоего, Христа Бога нашего, и всем твориши спастися, в державный Твой покров прибегающих. Всех нас заступи, о Госпоже Царице и Владычице, иже в напастех и скорбех и в болезнях, обремененных грехи многими, предстоящих и молящихся Тебе умиленною душою и сокрушенным сердцем пред пречистым Твоим образом со слезами, и невозвратно надежду имущих на Тя, избавления всех зол, всем полезная даруй и вся спаси, Богородице Дево: Ты бо еси Божественный покров рабом Твоим.

Кондак, глас 8

Притецем, людие, к тихому сему и доброму пристанищу, скорой Помощнице, готовому и теплomu спасению, покрову Девы: ускорим на молитву и потщимся на покаяние: источает бо нам неоскудная милости Пречистая Богородица, предваряет на помощь и избавляет от великих бед и зол благонравныя и богобоящияся рабы Своя.

Величание

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою притекающим.